



**13 de setembro de 2011.** O tribunal vén de desestimar o recurso de "Energías del Deza, SL." contra a anulación de **tres minicentrais** neste río en plena Rede Natura. A empresa é propiedade de Luis Castro Valdivia (cuñado do ex-director xeral de Industria Ordás Badía) imputado pola Fiscalía na trama das minicentrais, e un dos principais beneficiarios da enxurrada de concesións hidroeléctricas feitas en 2005 polo goberno Fraga en funcións. Estas instalacións foran

**anuladas polo bipartito**

por graves irregularidades nas declaracións de impacto ambiental asinadas polo goberno do que Núñez Feijóo era vicepresidente. Agora o TSXG, ao desestimar o recurso da empresa como fixera coa

[piscifactoría de Rinlo](#)

, pon novamente en evidencia

**a corrupción e a chafallada administrativa**

de quen autorizou, sen base legal, dúas proxeccións de alto impacto para beneficiar aos amigos.

**Sentenza TSXG ENCOROS DEZA**

ADEGA, que no seu momento apresentou alegacións (e recurso de alzada) contra estas e outras moitas minicentrais tramitadas de xeito "express" durante a era Fraga, quere transmitir os parabéns á veciñanza de Merza, que ao igual que a de Caldas e outras moitas poboacións, comprometéronse na loita contra as minicentrais adicando tempo e recursos a salvagardar os nosos ríos.

A sentenza deixa ben claro cal foi o proceder duns e doutros: mentres a Xunta aprobaba Declaracións de Impacto Ambiental fraudulentas para beneficiar aos amigos, veciños e ecoloxistas asumían a tarefa de defender co seu propio patrimonio a integridade dos espazos protexidos galegos.

O TSXG fundamenta, o rexeitamento do recurso de Energías del Deza S.L. en que a devandita DIA asinada polo goberno Fraga:

-“(…) non inclúe un estudo de sinerxias onde se avalíen os efectos da instalación destes novos aproveitamentos en relación aos xa existentes, tal e como sinala no artigo 3.b) 1 do Decreto 442/1990, do 13 de setembro, de avaliación de impacto ambiental para Galicia, sendo esta cuestión dunha importancia indubidable neste procedemento por canto existen numerosas concesións outorgadas e en trámite no Sistema Fluvial Ulla-Deza (…)”

-“(…) Non contén tampouco a descripción dos métodos en orde a coñecer a repulsa ou

*aceptación social deste proxecto, contido esixido polo apartado 6 do artigo 3.c) do Decreto 442/1990, do 13 de setembro, de avaliación de impacto ambiental para Galiza, (...) "*

*-(...) Tampouco inclúe, tal e como alegan os recurrentes, o estudo comparado de situación ambiental actual e futura esixido no apartado 5 do artigo 3b) do Decreto 442/1990, do 13 de setembro, de avaliación de impacto ambiental para Galiza. (...) "*

*-(...) a DIA emitida supedita a viabilidade dos aproveitamentos a que se acredite en estudos posteriores a non causación de impactos, entre eles o causado ao Sistema Fluvial Ulla-Deza, tratando de cubrir a través destes estudos as carencias e lagoas detectadas nos estudos ambientais, polo que, en definitiva, se está admitindo que se outorgue a concesión ser ter avaliado cal é a opción máis conveniente dende o punto de vista ambiental, incluída a non realización dos proxectos.*

*-A irregularidade descrita acentúase aínda máis se se ten en conta que a DIA foi modificada o 9 de agosto de 2005 a solicitude do organismo autónomo Augas de Galicia [governo bipartito] aos efectos de substituír na realidade a avaliación de viabilidade ambiental dos aproveitamentos, xa irregularmente posposta ao trámite de aprobación do proxecto constructivo segundo se acaba de expoñer, á fase de previo inicio de obra, co que resulta que a decisión final do órgano ambiental realízase unha vez outorgada a concesión para o aproveitamento hidroeléctrico e unha vez autorizado o proxecto constructivo, circunstancia coa que se desvirtúa aínda máis o procedemento legalmente establecido (...) "*

Son estes argumentos de peso, compartidos nas alegacións e recursos de alzada, recoñecidos pola Consellería de Medio Ambiente logo da chegada do bipartito e avalados agora polo TSXG, que deixan en evidencia as chafalladas, irregularidades e tratos de favor de Augas de Galicia e a dirección Xeral de Calidade e Avaliación Ambiental durante a administración Fraga.